

SL(5)638 – Rheoliadau Diogelu Iechyd (Cyfyngiadau Coronafeirws) (Rhif 2) (Cymru) (Diwygio) (Rhif 19) 2020

Cefndir a Diben

Mae'r Rheoliadau hyn yn diwygio Rheoliadau Diogelu Iechyd (Cyfyngiadau Coronafeirws) (Rhif 2) (Cymru) 2020 (y "prif Reoliadau"). Gwneir y Rheoliadau o dan adrannau 45C(1), a (3)(c), 45F(2) a 45P o Ddeddf Iechyd y Cyhoedd (Rheoli Clefydau) 1984.

Mae'r Rheoliadau hyn:

- yn gosod cyfyngiadau ar bersonau sy'n teithio i ardaloedd o Gymru nad ydynt wedi eu dynodi'n ardaloedd diogelu iechyd lleol o rannau o Loegr, yr Alban a Gogledd Iwerddon sydd â chyffredinrwydd uchel o'r Coronafeirws, a chyfyngiadau cyfatebol ar bobl sy'n teithio o Gymru i ardaloedd o'r fath. Yr ardaloedd sydd â chyffredinrwydd uchel yw'r rhai a ddynodwyd fel a ganlyn gan yr awdurdod perthnasol yn y rhan honno o'r DU:
 - Lloegr – pob ardal Haen 2 "uchel" a Haen 3 "uchel iawn"
 - Yr Alban – ardaloedd wedi eu diogelu sy'n destun mesurau dros dro ychwanegol
 - Gogledd Iwerddon – y diriogaeth gyfan ar hyn o bryd.
- yn darparu bod mynd i mewn i ardal diogelu iechyd leol, neu ei gadael, i gymryd rhan mewn gweithgareddau, neu eu hwyluso, a drefnir ar gyfer datblygiad neu lesiant plant yn esgus rhesymol, ac maent yn addasu'r esgusodion rhesymol dros ymgynnull ac am fynd i mewn i ardal diogelu iechyd leol, neu ei gadael, fel eu bod yn gyson.
- yn gwneud newidiadau mân a chanlyniadol i sicrhau cysondeb a diweddarau enw llawn "Menai (Bangor)" fel un o'r adrannau etholiadol yng Ngwynedd, a restrir ym mharagraff 1 o Atodlen 4A i'r prif Reoliadau.

Daw'r Rheoliadau i rym am 6.00 p.m. ar 16 Hydref 2020. Mae'n rhaid i'r cyfyngiadau a'r gofynion a gyflwynir gan y diwygiadau hyn mewn perthynas â theithio gael eu hadolygu ar 23 Hydref 2020, neu cyn hynny, ac o leiaf unwaith bob saith diwrnod wedi hynny.

Y weithdrefn

Gwneud cadarnhaol.

Gwnaed y Rheoliadau hyn gan Weinidogion Cymru cyn iddynt gael eu gosod gerbron y Senedd. Mae'n rhaid i'r Senedd gymeradwyo'r Rheoliadau o fewn 28 diwrnod (ac eithrio



diwrnodau pan fo'r Senedd: (i) wedi'i diddymu neu (ii) ar doriad am fwy na phedwar diwrnod) i'r dyddiad y'u gwnaed er mwyn iddynt barhau i gael effaith.

Materion technegol: craffu

Nodwyd y pwynt a ganlyn i gyflwyno adroddiad arno o dan Reol Sefydlog 21.2 mewn perthynas â'r offeryn hwn.

1. Rheol Sefydlog 21.2(v) – bod angen eglurhad pellach ynglŷn â'i ffurf neu ei ystyr am unrhyw reswm penodol

Mae rheoliad 2(4)(a) o'r Rheoliadau hyn yn gwneud diwygiadau i reoliad 14(2) o'r prif Reoliadau ac i "is-baragraff (b)". Nid yw rheoliad 2(4)(a) o'r fersiwn Gymraeg o'r Rheoliadau hyn yn cyfeirio at is-baragraff (b). Yn hytrach, mae'n dweud "ym mharagraff (2)". Dylai'r testun Cymraeg ddarllen fel "yn is-baragraff (b)" er mwyn sicrhau eglurder a chysondeb â'r fersiwn Saesneg.

Rhinweddau: craffu

Nodwyd y 4 pwynt a ganlyn i gyflwyno adroddiad arnynt o dan Reol Sefydlog 21.3 mewn perthynas â'r offeryn hwn.

1. Rheol Sefydlog 21.3(ii) – ei fod o bwysigrwydd gwleidyddol neu gyfreithiol neu ei fod yn codi materion polisi cyhoeddus sy'n debyg o fod o ddiddordeb i'r Senedd.

Rydym yn nodi cyfiawnhad Llywodraeth Cymru dros unrhyw ymyrraeth bosibl â hawliau dynol. Yn benodol, nodwn y paragraffau a ganlyn yn y Memorandwm Esboniadol:

"Mae'r Llywodraeth o'r farn bod y cyfyngiadau a osodwyd gan y diwygiadau a wnaed gan y Rheoliadau hyn i'r prif Reoliadau, yn gymesur. Mae'r diwygiadau hyn yn cydbwysu'r angen i gynnal ymateb priodol i'r bygythiad a achosir gan y coronafeirws â'r angen i gynnal hawliau unigolion a busnesau, mewn modd sy'n dal i fod yn gymesur â'r angen i atal cyfradd drosglwyddo'r coronafeirws rhag cynyddu, gan ystyried y dystiolaeth wyddonol."

2. Rheol Sefydlog 21.3(ii) – ei fod o bwysigrwydd gwleidyddol neu gyfreithiol neu ei fod yn codi materion polisi cyhoeddus sy'n debyg o fod o ddiddordeb i'r Senedd.

Rydym yn croesawu'r dystiolaeth a ddarparodd Llywodraeth Cymru yn y Memorandwm Esboniadol yn esbonio'r rheswm bod y prif Reoliadau wedi'u diwygio i gyfyngu ar deithio o ardaloedd eraill, ac at ddibenion caniatáu i bersonau adael ardal diogelu iechyd leol os bydd ganddynt esgus rhesymol dros wneud hynny. Credwn y bydd darparu'r dystiolaeth hon yn helpu o ran tryloywder, ac yn helpu gyda gwaith craffu'r Senedd ar gyfyngiadau'r coronafeirws. Yn benodol, nodwn y paragraff a ganlyn o'r Memorandwm Esboniadol sy'n cyfeirio at yr adroddiad "SARS-Cov-2 Genomic Insights".



"Mae tystiolaeth gan weithwyr iechyd y cyhoedd proffesiynol yn awgrymu bod y coronafeirws yn symud o'r dwyrain i'r gorllewin ar draws y DU ac ar draws Cymru. Fel rheol gyffredinol, mae'n canolbwyntio ar ardaloedd trefol cyn lledu i ardaloedd llai poblog o ganlyniad i bobl yn teithio. Mae'r papur SARS-Cov-2 Genomic Insights (Hydref 2020) yn dangos lledaeniad yr haint yn ddaearyddol ac yn cefnogi'r achos dros gyfyngiadau teithio fel modd o reoli'r lledaeniad. I atal lledaeniad pellach mewn ardaloedd lle mae nifer yr achosion o'r feirws yn parhau i fod yn gymharol isel, mae angen cyfyngu ar fyrder ar deithio nad yw'n hanfodol ar draws y DU. Bydd y diwygiadau'n cyflawni'r nod hwn.

https://llyw.cymru/sites/default/files/publications/2020-10/dealltwriaeth-genomig-sars-cov-2-hydref-2020_0.pdf

3. Rheol Sefydlog 21.3(ii) – ei fod o bwysigrwydd gwleidyddol neu gyfreithiol neu ei fod yn codi materion polisi cyhoeddus sy'n debyg o fod o ddiddordeb i'r Senedd.

Nodwn na fu unrhyw ymgynghori ffurfiol ar y Rheoliadau hyn. Yn benodol, nodwn y paragraffau a ganlyn yn y Memorandwm Esboniadol:

"O ystyried y bygythiad difrifol ac uniongyrchol a achosir gan y coronafeirws a'r angen am ymateb iechyd y cyhoedd brys, ni fu ymgynghoriad cyhoeddus mewn perthynas â'r Rheoliadau hyn. Yn ehangach, cafodd grwpiau cynrychiolwyr ynghyd ag unigolion a busnesau wybod am lacio'r cyfyngiadau drwy ddarllodiadau gwybodaeth eang a pharhaus i'r cyhoedd ledled y DU, gan gynnwys gennyf innau. Ynghyd â Gweinidogion eraill a Llywodraeth Cymru, rwyf wedi parhau i roi'r wybodaeth ddiweddaraf i unigolion a busnesau gydol y newidiadau dilynol i'r Rheoliadau."

4. Rheol Sefydlog 21.3(ii) – ei fod o bwysigrwydd gwleidyddol neu gyfreithiol neu ei fod yn codi materion polisi cyhoeddus sy'n debyg o fod o ddiddordeb i'r Senedd.

Nodwn nad oes asesiad o'r effaith ar gydraddoldeb ar gyfer y Rheoliadau hyn a gofynnwn i Lywodraeth Cymru esbonio pa drefniadau y mae wedi eu gwneud, mewn perthynas â'r Rheoliadau hyn, i gyhoeddi adroddiadau o'r asesiadau o'r effaith ar gydraddoldeb yn unol â rheoliad 8(1)(d) o Reoliadau Deddf Cydraddoldeb 2010 (Dyletswyddau Statudol) (Cymru) 2011.

Y goblygiadau yn sgil ymadael â'r Undeb Ewropeaidd

Dim.

Ymateb Llywodraeth Cymru

Mae angen ymateb gan Lywodraeth Cymru o ran y pwynt adrodd technegol a phwynt 4 adrodd rhinweddau yn unig.



Trafodaeth y Pwyllgor

Trafododd y Pwyllgor yr offeryn yn ei gyfarfod ar 2 Tachwedd 2020 ac mae'n cyflwyno adroddiad i'r Senedd yn unol â'r pwyntiau adrodd uchod. Yn ogystal, nododd y Pwyllgor fod yr offeryn wedi'i ddirymu gan y Rheoliadau Diogelu Iechyd (Cyfyngiadau Coronafeirws) (Rhif 3) (Cymru) 2020.



Senedd Cymru

Pwyllgor Deddfwriaeth, Cyfiawnder a'r Cyfansoddiad

—

Welsh Parliament

Legislation, Justice and Constitution Committee